

Կիլիկիայի հայկական պետութեան ժամանակաշրջանի մեծահռչակ վանքերից մէկն է Կիլիկիայի Սկեւոյ ուխտը: Այդ վանքը հիմնուել է հաւանաբար 1073 թուականին՝ Լամբրոն բերդի վերակառուցման ժամանակ, Օշին իշխան Գանձակեցու կողմից Լամբրոն բերդի կողքին: Կարծիքներ կան, թէ Սկեւոյն նախքան Օշինեանների կողմից Լամբրոն բերդը վերանորոգելը եղել է բիւզանդական եկեղեցական հաստատութիւն: Սակայն այդ մասին չկայ ոչ մի փաստ:

Սկեւոյի վանքը, կրօնական հաստատութիւն լինելուց բացի, եղել է նաեւ հայ գրչութեան տարածման կենտրոններից մէկը: Այստեղ գրուել են բազմաթիւ ձեռագիր մատենաներ: Կիլիկիայի հայկական մանրանկարչութեան եւ գրչութեան զարգացման ասպարէզում XII դարի երկրորդ կէսին Սկեւոյն գրուել է առաջաւոր դիրք: Սկեւոյի վանքում մշակուել են Կիլիկիայի հայ գրչութեան քերականական հիմունքները եւ մատենաների կազմման նորաձեւութիւնը: Սկզբում Լամբրոնի իշխանների ու Բիւզանդիայի պետական վարչութիւնների կարգադրութեամբ Սկեւոյում դասաւանդուում էր յունարէն լեզու ու քերականութիւն: Այստեղ յունարէն գրականութեան օրինակաբանութիւնների հիման վրայ մշակուել են հայերէն գրչութեան նրբութիւնները, որոնք հետագայում Կիլիկիայի հայ գրչութեան որոշիչ առանձնայատկութիւնը հանդիսացան: Սկեւոյում մշակուել էին հայերէն ձեռագրերի ձայնային-չեղտային կէտադրութիւնը, քերականական սկզբունքները, որոնք դարերի ընթացքում մոռացուել էին: Փաստօրէն, Սկեւոյն հայերի համար յունարէն լեզու, գրականու-

թեան եւ գրչութեան նրբութիւններ սովորեցնող մի ուսումնարանի դեր է ունեցել:

XIII դարի առաջին կէսին Կիլիկիայի գրչութիւնը, հետեւապէս նաեւ Սկեւոյի-նը, որոշ չափով կորցրել էր իր առաջընթաց դերը: Դրա պատճառը Մեծն Լեւոն թագաւորի եւ Ջապէլ թագուհու կառավարման շրջանում տեղի ունեցած աշխարհակալական պատերազմներն էին: Սակայն XIII դ. երկրորդ կէսին՝ Հեթում I-ի թագաւորութեան ժամանակ, երկրի խաղաղութիւնը վերահաստատուած լինելու հանգամանքի բերումով, ընդհանուր առմամբ շարունակուել էր գրչութեան վերելքը:

Սկեւոյում գրուել են բազմաթիւ ձեռագրեր, որոնց մի մասը մատնուել է կորստի սելջուկ-թուրքերի 1281 թ., 1305 թ. եւ միւս յարձակումների ու այլ պատճառների հետեւանքով: Մեզ հասած հայերէն յայտնի ձեռագրերը հետեւեալներն են.

– 1154 թ. Գէորգ վրդ. Սկեւոյցի՝ տիկին Խուշմիշի եւ Ստեփաննոս քահանայի համար գրել է մի ճաշոց¹:

– 1173 թ. Գրիգոր Մլիճեցի գրիչ-ծաղկողը՝ Ներսէս Լամբրոնացու պատուէրով գրել է Գր. Նարեկացու «Մատենանոց բերգութեան»-ը²:

– 1173 թ. Գրիգոր Մլիճեցին օգնականների՝ Վարդանի ու Կոստանդինի հետ Ն. Լամբրոնացու պատուէրով պատրաստել է մի գեղեցիկ Աւետարան, որը մինչեւ Համաշխարհային I պատերազմը գտնուում էր Տիգրանակերտի Սբ. Կիրակոս եկեղեցում: Այժմ այն համարուում է կորած³:

– 1177-1182 թթ. Սկեւոյի Սբ. Զօրաւոր եկեղեցու Աւետեաց (Աւետիք) քահանան գրել է Ներսէս Լամբրոնացու «Խորհր-

դածութիւնը՝ ի կարգս եկեղեցւոյ...» աշխատութիւնը: Դրանից էլ 1691 թ. ընդօրինակուել է մի նոր ձեռագիր մատենան⁴:

– 1190 թ. Սամուէլ գրիչը՝ Ներսէս արքեպ. Սկեւոյի⁵ առաջնորդի պատուէրով օրինակել է «Լամբրոնացու Մեկնութիւն Սաղմոսաց եւ այլն»-ը⁶:

– 1192 թ. Սկեւոյում մի ձեռագիր մատենան է գրուել⁷:

– 1193 թ. Կոստանդին գրիչ-նկարիչը Ներսէս Լամբրոնացու եւ նրա եղբայր Հեթում սեպաստոսի պատուէրով օրինակել է մի հիանալի Աւետարան⁸:

– 1197 թ. Գրիգոր Մլիճեցի գրիչ-ծաղկողը Ստեփաննոս քահանայի համար Մլիճում սկսած Աւետարանը աւարտել է Սկեւոյում⁹:

– 1198 թ. Խաչատուր վանականը իր ուսուցիչ Ներսէս Լամբրոնացու մահուան առթիւ գրել է նշանաւոր «Ողբը»¹⁰:

– 1198 թ. Ներսէս Լամբրոնացու պատուէրով գրուել է «Յովհաննէս Ոսկեբերան, ձառք»-ը¹¹:

– 1198 թ. գրուել է մի ձեռագիր մատենան¹²:

– 1205 թ. Պետրոս Սկեւոյցի քահանան իր մերձաւորների մահից յետոյ արտագրել է «Գիրք մեկնութեան թղթոց»-ը¹³:

– 1215/6 թ. Ստեփաննոսի պատուէրով գրուել է Գրիգոր Մլիճեցի գրիչի՝ Սկեւոյում սկսած ու Տարսնում մի անհայտ գրիչի աւարտած Նոր Կտակարանը (Նոր Զուգայի Ամենափրկիչ եկեղեցի)¹⁴:

– 1216 թ. Բարսեղ քահանան Կարապետ քահանայի համար գրել է «Գրիգոր Լուսաւորիչ, Յաճախապատում ձառք»¹⁵:

– 1218 թ. Սկեւոյում գրուել է մի Աւետարան¹⁶:

– 1263 թ. Ստեփաննոս քահանան եւ Աւգսենտ արքեպան Հայրապետ քահանայի համար պատրաստել են մի Աւետարան¹⁷:

– 1275 թ. Ստեփաննոս քահանան Յովհաննէս քահանայի պատուէրով որդեգիր Կոստանդին քահանային նուիրելու համար մի Մանրուսմունք գրեց¹⁸:

– 1278 թ. Ստեփաննոս քահանան Սկեւոյի մի այլ Ստեփաննոս քահանայի պատուէրով գրել է մի Մանրուսմունք¹⁹:

– 1283 թ. Ստեփաննոս քահանան Կեւոն թագուհու պատուէրով գրել է մի Աւետարան²⁰:

– 1285 թ. Ստեփաննոս Գոյներիցանցը Սկեւոյի Աստուածատուր քահանայի եւ Խաչատուր պատանու համար արտագրել է մի Աստուածաշունչ²¹:

– 1285 թ. Ստեփաննոս Գոյներիցանցը Գէորգ վրդ. Սկեւոյացու համար գրել է մի Նոր Կտակարան²²:

– 1290 թ. Ստեփաննոս քահանան Կոստանդնուպոլսեցի Թորոսի համար գրել է մի Աւետարան²³:

– 1293 թ. Ստեփաննոս գրիչը Գրիգոր քահանայի պատուէրով գրել է մի Աւետարան²⁴:

– 1295 թ. Կիրակոս գրիչը՝ Վարդանի համար գրել է մի Ժողովածոյ²⁵:

– 1295 թ. Ստեփաննոս քահանան իր եղբորորդի Լեւոն սարկաւազի խնդրանքով արտագրել է մի Աւետարան²⁶:

– 1296 թ. Պետրոս քահանան արտագրել է «Եսայի մարգարէն եւ Պօղոսի թղթերը»²⁷:

– 1298 թ. Գրիգոր քահանան Սկեւոյում ու Միսում տէր Վարդանի համար արտագրել է «Գէորգ Սկեւոյցի, Մեկնութիւն Եսայեայ»²⁸:

– ԺԳ դ. Ստեփաննոս գրիչը Բարսեղ քահանայի պատուէրով գրել է «Յովհաննէս Ոսկեբերան, Մեկնութիւն Յովհաննու»²⁹:

– ԺԳ դ. Սմբատ քահանան եւ Ստեփաննոս գրիչը գրել են «Կիրեղ Երուսա-

ղէմացի, «Կոչումն ընծայու[թեան» մատեանը»³⁰:

– 1314 թ. Ներսէս գրիչը Սկեւոյի առաջնորդ Կոստանդին եպս. Պեհեսնիցու պատուէրով գրել է մի Մայր Մաշտոց³¹:

– 1314 թ. Յովհաննէս գրիչը Սկեւոյի առաջնորդ Կոստանդին եպս. Պեհեսնիցու պատուէրով արտագրել է մի Հին Կտակարան³²:

– 1324 թ. Ստեփաննոս դպիրը՝ Աբրահամ կրօնաւորի համար գրել է մի Նոր Կտակարան³³:

– 1325 թ. Յովհաննէս գրիչը Սարգիս քահանայի պատուէրով գրել է մի Աւետարան եւ այդ մատեանը ծաղկել է Սարգիս Պիծակ քահանան³⁴:

– 1349 թ. Գրիգոր քահանան իր համար Սկեւոյի Աբ. Նշան եկեղեցում գրել է մի Մանրուսմունք³⁵:

Վերելում նշուած ձեռագրերի պատկառելի թիւը, հաւանաբար, մեզ որոշ մի գաղափար կը տայ, Սկեւոյ վանքի հայ գրչութեանը մատուցած ծառայութիւնների մասին: Սկեւոյ վանքում ձեռագիր մատեաններ պատրաստելու յատուկ արհեստանոցի գոյութեան մասին չկան տեղեկութիւններ: Սակայն կարելի է ենթադրել, որ այդպիսին պիտի լինէր:

Մեզ յայտնի ամենահին Սկեւոյի ձեռագիրը կրում է 1154 թուականը: Դա նշանակում է, որ Սկեւոյ վանքի հայ դպրութեանը ծառայելու գործունէութեան սկիզբը կարելի է համարել Հեթումի եւ Սմբատի (Ներսէս Լամբրոնացու) ծննդեան (1151-3 թթ.) կամ Լամբրոնի Աբ. Աստուածածին տաճարի կառուցման թուականները: Մինչ այդ (1073-1153 թթ.) ութսուն տարուայ ժամանակամիջոցում, Լամբրոնի Օշինեան իշխանները եւ Սկեւոյի առաջնորդները Բիւզանդիայից կախեալ վիճակի մէջ լինելու նիւթական հնարաւորութիւնների բացակայութեան ու այլ պատճառներով հայ

մշակոյթի նկատմամբ մնացել էին ձեռնպահ:

Սկեւոյի վանքը սկզբում կառուցուել է Լամբրոն բերդի երկայնանիստ քարաբլրի հիւսիսային ծայրին՝ անդունդի եզրին, բարձրահայեաց դիրքով՝ իբր մասունք պահելու «Պահարան»: Մեզ հասած ժամանակագրական տեղեկութեան մէջ խօսուում է Սկեւոյի հիմնադրման մասին, ուր պահուելու էր Աբ. Պետրոս առաքելի մատի մասունքը. «...եւ գտեալ զանառիկս (Լամբրոն) ամայացեալ շինէր ըստ կարի եւ պատրաստեաց նախ ՚ի ծայր բերդիս հանգստարան սուրբ եւ գլխաւոր առաքելոյն նշխարաց³⁶»: Սկեւոյ վանքի անունը ծագում է յունարէն «սկեւոս» բառից, որ նշանակում է մասունքի պահարան: Օշին Գանձակեցի իշխանը Պետրոս առաքելի մասունքը բերել է Հայաստանից:

Կիլիկիայում Ռուբինեան իշխանութեան հաստատման սկզբնական շրջանում (1080 թ.) Լամբրոնում ձեւաւորուել էր Օշինեան իշխանական տան հարստութիւնը: Այդ մասին հետեւեալն է գրել Սամուէլ քահ. Անեցիին (1100-1185/90 թթ.). «՚ի Շէթ (1124 թ.) ամին ՚ի բունութենէն Տաճկաց ել Օշին իշխանն ՚ի ժառանգութենէ իւրմէ՝ որ կոչի Մայրեաց ջուրք՝ հանդէպ Գանձակայ ունելով ընդ իւր զեղբայրն զՀալկամ. եւ զմայրն իւր՝ եւ զամուսինն իւր. ազատագունդ իշխանօքն եւ ամենայն գահիւն. ունելով ընդ իւր եւ զմատն սուրբ առաքելոյն Պետրոսի: Եւ եկեալ յաշխարհն Կիլիկեցոց եւ աջողմամբ Քրիստոսի եւ սուրբ մատին առաքելոյն էառ ի Տաճկաց եւ զականաւոր բերդն Լամբրոն. որ է մերձ առ ստորոտով լերինն Տորոսի ՚ի գահ մայրաքաղաքին Տարսոնի»³⁷:

Լամբրոն բերդը եւ նրա քարապետի հիւսիսի ծայրամասում գտնուող երկրորդ յարկի սկզբնական շրջանի մասունքի պահարան Սկեւոյ մատուռը տեղադրուած էր. «... յաշխարհիս Կիլիկեցոց ՚ի գլուխ

մայրաքաղաքին Տարսոնի, առ ստորոտով լերինն Տորոսի, առընթեր անառ ամրոցի Լամբրաւնի յաւթեան հռչակաւոր ուխտ Սկեւոա, առաջի սրբոյ եւ սքանչելագործ Նշանի եւ...»: Սա համապատասխանում է այժմու Թարսուս (Tarsus) գիւղաքաղաքի հիւսիսարեւմտեան կողմը՝ ուղիղ չափովով 38 կմ հեռու, Նամրուն լեռնային գիւղին: Քարապետի արեւելեան կողմի ստորոտով հոսում է Նամրուն-սոյու (Կալէ-սոյու) առուակը, որը միանում է Կիւղնոս (այժմ Թարսուս-չայը, Բերդան-չայը, Kúδvos Π) գետին:

Սկեւոյի վանքը ժամանակի պահանջներին զուգընթաց ընդարձակուել է մաս առ մաս: Նախ քարապետի բարձունքից տեղափոխուել է նրա հարաւարեւելեան կողմի ստորոտը՝ Նամրուն-սոյու առուակի տափարակ դաշտը: Այդ տեղը այժմ կոչուում է Թորոսձուկ եւ ծածկուած է անտառներով, թփուտներով ու մացառներով: Քարաբլրի բարձունքից եւ բերդից ներքեւ նայելիս հազիւ տեսանելի են աւերակի վերածուած պարսպապատ վանքի պատերի մնացորդները: Շրջապատում կան գիւղացիների առանձնատներ եւ Դաշտային Կիլիկիայի հարուստ բնակիչների ամառանոցներ:

Օշին II իշխանը իր առաջին արու (Հեթում) գաւակի ծննդեան առթիւ 1151-3 թթ. այդտեղ կառուցում է Աբ. Աստուածածին տաճարը, ուր 1160 թուականին մանուկ Ներսէս Լամբրոնացին սկսել էր սովորել³⁸: Աբ. Աստուածածին տաճարը նախ գոհացում պիտի տար Լամբրոն բերդաւանի աճող հայ բնակչութեան հոգեւոր պահանջներին: Դա լինելու էր նորակառոյց Սկեւոյ վանքի սկզբնաւորութիւնը: Բացի այդ, հաւատացեալ հասարակութեան համար դիւրամատչելի մի վայրում էր գտնուում Աբ. Աստուածածին տաճարի դիրքը:

Լամբրոնի իշխանները Սկեւոյում սկսել էին ստեղծել տոհմական դամբարան:

Մինչ այդ Պապեռոնի եւ Լամբրոնի իշխանների ընտանեկան դամբարանը գտնուում էր Մլիճ վանքում: Սկեւոյի ընդարձակումից յետոյ այդտեղ թաղուում էին միայն Լամբրոնի իշխանական տան անդամները: Սկեւոյի վանքում թաղուածներէից են.

– 1143 թ. Սեպաստոս Հեթում II իշխան Լամբրոնի,

– 1170 թ. Սեպաստոս Օշին II իշխան Լամբրոնի,

– 1190 թուից յետոյ Շահանդուխտ (Օշին II իշխանի կինը եւ Ներսէս Լամբրոնացու մայրը),

– 1190 թուից յետոյ Տալիթա եւ Շուշան (կուսակրօն քոյրեր),

– 1198 թ. Ներսէս Լամբրոնացի³⁹,

– 1263 թ. Կալամառի (Մարիամ) քոյր Հեթում I թագաւորի եւ կոմսուհի Հոպպէի ու Ռամլայի (Marie countesse de Jaffe)⁴⁰: Մահացել է Լամբրոնում եւ թաղուել Սկեւոյում:

Սկեւոյում գրուած վերոյիշեալ ձեռագիր մատեանի յիշատակարանից պարզուում է, որ 1177 թ. Սկեւոյի եկեղեցիներից մէկը կոչուել էր Աբ. Զօրավար: Սա, հաւանաբար, պիտի լինէր Լամբրոն բերդի միջի եկեղեցին, որը կցուել էր Սկեւոյ վանքի վարչութեանը: Բերդերի միջի մատուռները կամ եկեղեցիները ընդհանրապէս անուանուում էին Աբ. Զօրավար, Աբ. Գէորգ, Աբ. Թորոս, Աբ. Սարգիս եւ Աբ. Վարդան:

Ըստ 1192 թ. գրուած ձեռագրի՝ Սկեւոյ վանքի եկեղեցիները (հովանիները) եղել են. «՚ի վանքս Սկեւոայ, ընդ հովանեալ տեառն Աստուծոյ եւ Փրկչին մերոյ Յիսուսի Քրիստոսի տաճարի մաւր Աստուածածնի եւ կենսակիր պատուական սուրբ փայտիս...»⁴¹: Այստեղ այլեւս չի յիշատակուում Աբ. Զօրավար եկեղեցու անունը: Իսկ 1218-1283 թթ. Սկեւոյ վանքի եկեղեցիների անունները մնացել են անփոփոխ. «...՚ի մեծանուն ուխտս Սկեւոայ, ընդ հովանեալ

Սուրբ Փրկչիս, լուսոյ Աստուածածնիս եւ կենսակիր Սուրբ Նշանիս, մերձ յանմատոյց դղեակս Լամբրուսն, որ է 'ի գլուխ Տարսոսի եւ 'ի ստորոտ մեծի լերինս Տաւրոսի...»: Կիրակոս Գանձակեցին տեղեկացնում է, որ Ներսէս Լամբրոնացին Սկեւոյ վանքում կառուցել է մի հրաշագան եկեղեցի. «Շինեաց եւ եկեղեցի հրաշագան 'ի վանքն, որ կոչի Սկեւոյ, հուպ 'ի բերդն անառ Լամբրոն, եւ կարգեաց զպաշտօն վանիցն ըստ օրինակի...»⁴²: Ն. Լամբրոնացու՝ Սկեւոյ յում եկեղեցի կառուցելու եղելութիւնը պէտք է հասկանալ Սկեւոյի եկեղեցիներէրից մէկի շքեղ կերպով վերաշինութիւն:

Սկեւոյի Սուրբ Նշան եկեղեցում, որը ծանօթ էր «կենսակիր» մակդիրով, պահուում էր ինչ-որ «կենսակիր սուրբ փայտ»: Դա Քրիստոսի խաչի փայտից մի կտոր էր, որը, իբր սուրբ մասունք, պահուում էր մեծ զգուշութեամբ: Իսկ Սկեւոյի Սբ. Ամենափրկիչ կամ Սբ. Փրկիչ եկեղեցում պահուում էին այլ սրբերի մասունքներ: Այդ մասին են վկայում այժմ Ս. Պետրբուրգի էրմիտաժում պահուող եւ 1293 թ. Սկեւոյի առաջնորդ Կոստանդին եպս. Պեհեսնիցու պատուէրով պատրաստուած արծաթ եւ ոսկեայ ականակուռ սրբարան-մասնատուփի արձանագրութեան հետեւեալ տողերը.

- Ձոր տամ ընձայ Գուրիական:
- Փառաց փրկչիս տնարեմութեան:
- 'ի տաճարիս իւր սրբութեան:
- 'ի սբ Փրկիչն որ 'ի Սկեւոյսն:
- Ձոր պահեսցէ տր ընդ երկայն:
- Աւոր յանշարժ հաստատութեան:
- Եւ գրոյր զՀայաստան⁴³:

1201 թ. Լամբրոն բերդը Լեւոն I թագաւորի կողմից խաբէութեամբ գրաւելուց եւ արքունի տիրոյթներին կցուելուց յետոյ Սկեւոյն այլեւս դադարում է Լամբրոնի Օշինեան իշխանական տան դամբարանը լինելուց: Սկեւոյի գերեզմանոցում թա-

ղուել են նաեւ Սկեւոյի աչքի ընկնող վանականներից մի քանիսը: Ենթադրուում է, որ Ներսէս Լամբրոնացու կենսագիր եւ մերձաւոր վանականներից Սամուէլ գրիչը թաղուած է Սկեւոյի գերեզմանոցում⁴⁴:

Սկեւոյի վանքը, լինելով Լամբրոնի բախտակիցը, բազմաթիւ անգամներ զգացել է թշնամու աւերիչ յարձակումների դառնութիւնը: Այդ պատճառով էլ վանքի շուրջը կառուցուած են եղել աշտարակներ (պուրճ) եւ պարիսպ: Այդ մասին են վկայում վերոյիշեալ Կոստանդին եպս. Պեհեսնիցու 1314 թ. գրել տուած ձեռագիր Հին Կտակարանի յիշատակարանի հետեւեալ տողերը.

«...երախտաւոր սպասաւորին իմոյ Յակովբայ քահանայի, ... եւ երկու ամաւք յառաջ քան զգրել սուրբ գրոցս, փոխեցաւ 'ի Քրիստոս վասն սիրայորդոր փութոյ տաճարիս եւ յաւժար կամաւք աշխատելոյ 'ի վերակացութիւն շինութեան տաճարիս, յիշատակ նորա աւրհնութեամբ եղիցի...»⁴⁵: Իսկ նոյն 1314 թ. Կոստանդին եպս. Պեհեսնիցու պատուիրած Մաշտոցի յիշատակարանում կարդում ենք. «...Բ[2] ամաւք յառաջ քան զգրել սուրբ գրոցս (իմա՝ 1312 թ.) փոխեցաւ 'ի Քրիստոս վասն սիրայորդոր փութոյ պրճիս եւ յաւժար կամաւք աշխատելոյ 'ի վերակացութիւն շինութեան պրճիս, եւ եթող ինձ մեծ եւ անմխիթար սուգ»⁴⁶:

Ինչպէս տեսնում ենք, մատենաներից մէկի յիշատակարանում խօսուում է «պուրճի», իսկ միւսի մէջ՝ «տաճարի» շինութեան մասին: Սկեւոյի սոյն աւերածութիւնը պատահած պիտի լինի 1305 թ. սելջուկ-թուրքերի կողմից Լամբրոնի եւ Սկեւոյի վրայ կատարուած յարձակման ժամանակ: Մեծ վնասների էին ենթարկուել Լամբրոնի եւ Սկեւոյի բնակիչները: Հրկիզուել էր Սկեւոյի կառոյցների մեծ մասը: Այդպիսի յարձակումների ականատես եղաւ ԺԳ դարի երկրորդ կէսում եւ ԺԴ դարում Լամբ-

րոնի իշխանութեան երկրամասը: 1274 թ. Սկեւոյ վանքի աւերման մասին հետեւեալն է գրում ժամանակագիրը. «ՌՄԿԴ [1274] Հոռոմաց թուրքն այրեցին զհոչակաւոր ուխտն մենաստանի 'ի Սկեւոյն, եւ գերեաց զաւագ Մլիճին՝ եւ սպան 'ի բնակչացն անձինս Զ [6]»⁴⁷:

1281 կամ 1279 թուականին գրուած ձեռագրի յիշատակարանի բովանդակութիւնից պարզուում է, որ այդ թուականներին Սկեւոյ եւ Մլիճ վանքերը, սելջուկների յարձակումներին ենթարկուելով, այրուել են: Սկեւոյում եւ Մլիճում եղել են գերեզմարութիւն եւ սպանութիւններ⁴⁸:

Մեզ չի հասել Սկեւոյ վանքի առաջնորդների ամբողջական անուանացուցակը: Դէպքերի բերումով մեզ յայտնի են ակաւաւոր մի քանիսի անունները.

- 1176-119. թթ. Ներսէս արքեպս. Լամբրոնացի⁴⁹:
- 1190 թ. Ներսէս արքեպս.⁵⁰:
- 1198 թ. «Տէր Վարդան արքեպս. Լամբրոնին եւ առաջնորդ Սկեւոյին»⁵¹: Սա Մեծն Լեւոնի թագադրութեան հանդիսաւոր արարողութեան ներկաներից Վարդան Այգեկցին է:
- 1220 թ. Գրիգոր վարդապետ Սկեւոցի կամ Լամբրոնացի:
- 1285 թ. տէր Մինաս առաջնորդ Սկեւոյի⁵²:
- 1296 թ. Ստեփաննոս վարդապետ Սկեւոյի: Ղ. Ալիշանը համարում է Սկեւոյի առաջնորդ⁵³:
- 1291/2-1306 թթ. Կոստանդին եպս. Պեհեսնիցի:
- 1307-1311 թթ. Մարկոս վարդապետ Սկեւոցի⁵⁴:
- ԺԲ-ԺԴ դարերի ընթացքում Սկեւոյի առաջնորդութիւնը այնքան հզօրացել էր, որ շրջակայքում գտնուող վանքերի ու եկեղեցիների հոգեւոր վարչութիւնները միացուել էին Սկեւոյի եկեղեցական վար-

չութեան հետ: Սկեւոյ վանքի վարչական ոլորտը տարածուում էր շրջակայ Արմէնի լեւան Յովհաննուագարակ մենաստանի, Սբ. Գէորգ անապատի, Սաղրու Սբ. Աստուածածին վանքի, Ճիրակայ անապատի, Գանձէ պուրճի եւ ընդհանրապէս Լամբրոնի իշխանութեան տարածքի սահմանների մէջ գտնուող տիրոյթների եկեղեցական հիմնարկների վրայ:

Սկեւոյ վանքի հոգեւոր վարչութիւնը աստուածաբանական, թարգմանչական, գրչութեան, քերականական եւ այլ մշակութային գործերից բացի, մինչեւ ԺԴ դարի սկզբները թագաւորի դիւանագիտական խորհրդի կազմում զբաղուել ու գործուն մասնակցութիւն է ցուցաբերել դաւանաբանական հարցերի ուղղութեամբ:

Այժմ Սկեւոյի վանքի տեղադրումը կարելի է ճշտել միջնադարեան ժամանակագրութիւնների եւ յիշատակագրութիւնների ցուցումներով առաջնորդուելով: Ս. Անեցու մօտ նշուած է. «... եւ միշտ փառաւորեալ Աստուածածնին 'ի տաճար անուան իւրոյ որ 'ի վանքս Սկեւոյ (Սկեւոյ) առընթեր բերդիս (Լամբրոնին)⁵⁵» եւ ուրիշ մի տեղ էլ «... սուրբ ուխտս Սկեւոյ առընթեր հայրենատուր ամրոցի տէրանց մերոց Լամբրոնի...»⁵⁶:

Կիլիկիայի հայկական պետութեան անկումից (1375 թ.) յետոյ, ինչպէս Լամբրոն բերդը, այնպէս էլ նրա բախտակից Սկեւոյ վանքը լքուեց եւ մնաց անպաշտպան: Դրա հետեւանքով էլ վանքապատկան կառոյցները ընկան բնութեան եւ աւերիչ ձեռքերի կործանարար ազդեցութեան տակ: Սբ. Աստուածածին, Սբ. Փրկիչ եւ Սբ. Նշան եկեղեցիներից եւ յարակից շէնքերից բաղկացած վանքի աւերակները սփռուած են բաւականին ընդարձակ մի տարածքի վրայ: Սկեւոյ վանքի աւերակները կը գտնուին Լամբրոն բերդի հարաւարեւելեան կողմը եւ ստորոտից կէս ժամ հեռու ձորակի արեւելեան լանջին, տափարակ

դաշտավայրում: Վանքի հիւսիսային կողմը մի քանի կմ հեռու, կը գտնուի Օշին թագաւորի կառուցած Օշինի դղեակը, որը այժմ կոչւում է Սինապ կալէ (Sinapkalesi): Այժմ Սըղըր Եայլասը (Siğir yaylası) կոչուող սարահարթի հիւսիսային ծայրամասում կը գտնուի Օշինի դղեակը. իսկ Սկեւոայի վանքը գտնուում էր սարահարթի արեւմտեան եզրամասում ձորակի մօտ: Հիմնայտակ կործանուած վանքից մնացել են արտաքին պարիսպների մնացորդները, կիսակործան խորանի կիսաքմբէթները եւ կամարների, վանքապատկան սենեակների ու խուցերի մի ընդարձակ աւերակոյտ: Հնում վանքը շրջապատուած է եղել պտղատու ծառերի պուրակով: Երկար դարերի ընթացքում աւերուած վանքի տեղում աճել են մացառներ, անպիտան թփեր ու ծառեր: Իմ այցելութեան ժամանակ Նամրուն գիւղի թուրք գիւղացիներից մէկը ինձ առաջարկեց գնել ընկոյզի ծառեր:

Սըղըր Եայլասը սարահարթը տարածուած է Լամբրոն բերդի արեւելեան կողմի ձորի միջով հոսող առուակից դէպի արեւելք՝ մինչեւ Ժեռակրի (այժմ Ճէհէնէմ դէրեսի) գետակը: Սըղըր Եայլասը-ի հիւսիսային կողմում բարձրանում է Արմէնի լեռը, ուր գտնուում էր «Արմէնի լեռան Յովհաննու ագարակ (mandra)» մենաստանը: Սըղըր Եայլասը սարահարթի անունը ծագում է XI-XIV դդ. կիլիկիացի հայերի Սաղրու կոչած տեղանունից, ուր կար «Սաղրու Սբ. Աստուածածին վանքը» Սկեւոայից մէկ եւ Լամբրոն բերդից մէկուկէս ժամ հեռավորութեան վրայ: Հնում Սկեւոայի կանգուն վանքը պարզ աչքով եւ հիւսնալի կերպով տեսնուել է Լամբրոն բերդից:

Լեռնային Լամբրոն (Նամրուն) բերդաւան հետ գնալու համար անհրաժեշտ է ատոմեքենայով Տարսոնից (Թարսուս) դէպի հիւսիս-արեւմուտք՝ Շիւքրանիյէ եւ Քօճա Ուլաչ գիւղերի միջով հասնիլ Շամլար

գիւղ (20 կմ): Ապա, այդտեղից թեքուելով դէպի ձախ (արեւմուտք), հասնել Նամրուն:

Սրանից բացի գոյութիւն ունի մի երկրորդ ճանապարհ եւս, որը Կուկլակի կիրճի (Külek boğasi) տարանցիկ ճանապարհից տանում է Նամրուն: Սրանով կարելի է Տարսոնից եւ Ադանայից Բէյ-Դէղլիմէնի (38 կմ), Կաւակը (45 կմ), Դամլամա (60 կմ) գիւղերի միջով հասնել 65 կմ-ը ցոյց տուող նշանաքարին⁵⁷: Այդ կէտում՝ դէպի ձախ (արեւմուտք), ճանապարհը բաժանուած է եւ հասնում Նամրուն: Այդ կէտից մինչեւ Նամրուն ճանապարհի երկարութիւնը 37 կմ է: Այդ կէտը գտնուում է Թարսուսից 39 կմ, իսկ Պօզանտից (Pozanti) 40 կմ հեռու:

ԾԱՆՕԹԱԳՐՈՒԹԻՒՆՆԵՐ

- 1 Մաշտոցի անուան Մատենադարան, ձեռ. թիւ 832:
- 2 Մաշտոցի անուան Մատենադարան, ձեռ. թիւ 1568:
- 3 Գ. Սրուանձտեանց, Թորոս Աղբար, Կ. Պոլիս, 1884, հտ. Բ, էջ 442-444: Գարեգին Ա. Կաթողիկոս, Յիշատակարանը ձեռագրաց, հտ. Ա, Անթիլիաս, 1951, էջ 445: Լ. Ռ. Ագարեան, Կիլիկեան մանրանկարչութիւնը, Երեւան, 1964, էջ 55-56, S. Der-Nersessian, Manuscripts arméniens illustrés, p. 50.
- 4 Բաբգէն Աթոռակից Կաթողիկոս, Յուցակ ձեռագրաց Ղալաթիոյ Ազգային Մատենադարանի Հայոց, Անթիլիաս, 1961, էջ 908: Յ. Թօփչեան, Յուցակ ձեռագրաց Արմաշի վանքին, Վեներտիկ, 1962, էջ 11:
- 5 Սա Լամբրոնացի չէ:
- 6 Հ. Աճառեան, Հայոց անձնանունների բառարան, հտ. Դ, էջ 46: Ձեռ. Կարին, էջ 148:
- 7 Գարեգին Ա. Կաթողիկոս, Յիշատակարանը ձեռագրաց, էջ 561
- 8 Նոյն տեղում, էջ 565-570, Բ. Սարգիսեան, Մայր ցուցակ հայերէն ձեռագրաց Մատենադարանին Միսիթարեանց 'ի Վեներտիկ, 1914, հտ. Ա, էջ 549-560: Հ. Աճառեան, Հայոց անձնանունների բառարան, հտ. Բ, էջ 645, հտ. Ե, էջ 81: Ղ. Ալիշան, Սիսուան, էջ 98: S. Der-Nersessian, Manuscript arméniens..., p. 50-86.
- 9 Լ. Ռ. Ագարեան, Կիլիկեան մանրանկարչութիւնը, էջ 56: Այս ձեռագիրը յայտնի է «Վոլվի աւետարան» անունով:

- 10 Հ. Աճառեան, Հայոց անձնանունների բառարան, հտ. Բ, էջ 469, Ալիշան, Սիսուան, էջ 94-95, 98:
- 11 Մաշտոցի անուան Մատենադարան, ձեռ. թիւ 989:
- 12 Գարեգին Ա. Կաթողիկոս, Յիշատակարանը ձեռագրաց, էջ 617-618:
- 13 Հ. Աճառեան, Հայոց անձնանունների բառարան, հտ. Բ, էջ 379 եւ 473, հտ. Դ, էջ 247: Ղ. Ալիշան, Սիսուան, էջ 101:
- 14 Errol F. Rhodes, Ph.D., An Annotated list of Armenian new Testament manuscripts, Rikkyo University Ikebukuro, Tokyo, Japan, 1959, p. 32, N 215. Լ. Ռ. Ագարեան, Կիլիկեան մանրանկարչութիւնը, էջ 56, Գարեգին քահանայ Կիրակոսեան, Նոր Ջողայի մատենադարան, «Արարատ», 1910, էջ 884-885:
- 15 Մաշտոցի անուան Մատենադարան, ձեռ. թիւ 5528:
- 16 Ա. Ս. Մաթեոսեան, Հայերէն ձեռագրերի յիշատակարաններ, Ժ. Գ. դար, Երեւան, 1984, էջ 110:
- 17 Մաշտոցի անուան Մատենադարան, ձեռ. թիւ 8590:
- 18 Հ. Աճառեան, Հայոց անձնանունների բառարան, հտ. Բ, էջ 594, Ձեռագիր Հալեպի, հտ. Ա, էջ 244:
- 19 Հ. Աճառեան, Հայոց անձնանունների բառարան, հտ. Բ, էջ 45, հտ. Գ, էջ 717: «Օողակաթ», էջ 205, Մաշտոցի անուան Մատենադարան, ձեռ. թիւ 759:
- 20 Մաշտոցի անուան Մատենադարան, ձեռ. թիւ 6764:
- 21 Հ. Աճառեան, Հայոց անձնանունների բառարան, հտ. Բ, էջ 475, Ղ. Ալիշան, Սիսուան, էջ 106:
- 22 Errol F. Rhodes, Ph.D., An Annotated list of Armenian, p. 90, N 640.
- 23 Մաշտոցի անուան Մատենադարան, ձեռ. թիւ 2630:
- 24 Հ. Աճառեան, Հայոց անձնանունների բառարան, հտ. Բ, էջ 248, Ձեռ. Վասպուրակահի, էջ 111-112: Մաշտոցի անուան Մատենադարան, ձեռ. թիւ 5784:
- 25 Մաշտոցի անուան Մատենադարան, ձեռ. թիւ 488:
- 26 Գ. Սրուանձտեանց, Թորոս Աղբար, հտ. Բ, էջ 344:
- 27 Հ. Աճառեան, Հայոց անձնանունների բառարան, հտ. Դ, էջ 502, Ղ. Ալիշան, Սիսուան, էջ 107:
- 28 Մաշտոցի անուան Մատենադարան, ձեռ. թիւ 4214:
- 29 Մաշտոցի անուան Մատենադարան, ձեռ. թիւ 3816:

- 30 Մաշտոցի անուան Մատենադարան, ձեռ. թիւ 780:
- 31 Մաշտոցի անուան Մատենադարան, ձեռ. թիւ 2787:
- 32 Ե. Լալայեան, Յուցակ ձեռագրաց Վասպուրակահի, էջ 59-62:
- 33 Errol F. Rhodes, Ph.D., An Annotated list of Armenian, p. 20, N 129.
- 34 Մաշտոցի անուան Մատենադարան, ձեռ. թիւ 5708: Հ. Աճառեան, Հայոց անձնանունների բառարան, հտ. Գ, էջ 181, 274 եւ 610: Ե. Լալայեան, Յուցակ ձեռագրաց Վասպուրակահի, էջ 171:
- 35 Մաշտոցի անուան Մատենադարան, ձեռ. թիւ 7157:
- 36 Սամուէլի քահանայի Անեցոյ, Հաւաքմունք 'ի գրոց պատմագրաց, աշխատ. Արշակ Տէր-Միքէլեանի, Վաղարշապատ, 1893 էջ 225: «Պատմութիւն վարոց Ներսիսի եպիսկոպոսին երգոցս Սաղմոսին քննողի»
- 37 Սամուէլ Անեցի, էջ 117:
- 38 Մեսրոպ վրդ. Քէշիշեան, Յուցակ հայերէն ձեռագրաց Ջմառի վանքի մատենադարանի, Վիեննա, 1964, էջ 754
- 39 Մկրտիչ վրդ. Աւգերեան, Լիակատար վարք եւ վկայաբանութիւն սրբոց, Վեներտիկ, 1813, հտ. Ե, էջ 351:
- 40 Հ. Աճառեան, Հայոց անձնանունների բառարան, հտ. Բ, էջ 575:
- 41 Գարեգին Ա. Կաթողիկոս, Յիշատակարանը ձեռագրաց, հտ. Ա, Անթիլիաս, 1951, էջ 561:
- 42 Կիրակոս Գանձակեցի, Պատմութիւն Հայոց, աշխատասիրութեամբ Կ. Ա. Մելիք-Օհանջանեանի, Երեւան, 1961, էջ 111:
- 43 Ղ. Ալիշան, Սիսուան, էջ 109:
- 44 Նոյն տեղում, էջ 98:
- 45 Ե. Լալայեան, Յուցակ ձեռագրաց Վասպուրակահի, էջ 60-61:
- 46 Ժ. Դ. դարի հայերէն ձեռագրերի յիշատակարաններ, աշխ. Լ. Ս. Խաչիկեանի, էջ 106, անտ. ՄՄ, ձեռ. թիւ 2787:
- 47 Սամուէլ Անեցի, էջ 162:
- 48 Գարեգին Ա. Կաթողիկոս, Յիշատակարանը ձեռագրաց, էջ 527:
- 49 Մ. Աւգերեան, Լիակատար վարք եւ վկայաբանութիւն սրբոց, հտ. Ե, էջ 344-351:
- 50 Հ. Աճառեան, Հայոց անձնանունների բառարան, հտ. Դ, էջ 46:
- 51 Սմբատ Սպարապետ, Տարեգիրք, Վեներտիկ, 1956, էջ 209:
- 52 Ղ. Ալիշան, Սիսուան, էջ 106, Հ. Աճառեան, Հայոց անձնանունների բառարան, հտ. Գ, էջ 340, Գ. Ջարբիանյան, Թարգմ., էջ 156, Ղ. Ալիշան, Հայաստանում, էջ 495, «Տաթև», 1927, էջ 188:

